



Republika e Kosovës
Republika Kosovo - Republic of Kosovo
Kuvendi - Skupština - Assembly

Legjislatura IV
Sesioni pranveror

Mbledhja plenare e Kuvendit
P- 108
Prishtinë, më 29 mars 2013

PROCESVERBAL

**I MBLEDHJES PLENARE TË KUVENDIT TË REPUBLIKËS SË KOSOVËS,
E MBAJTUR MË 29 MARS DHE 4 PRILL 2013**

Mbledhjen e kryesoi kryetari Jakup Krasniqi, ndërsa i ndihmoi nënkryetari Xhavit Haliti.

Kryetari i deklaroi të hapura punimet e mbledhjes plenare dhe procedoi me rendin e ditës, të përgatitur nga Kryesia e Kuvendit, në marrëveshje me kryetarët e grupeve parlamentare.

Kuvendi i zhvilloi punimet me këtë:

Rend dite

1. Debat parlamentar për gjendjen ekonomike në Kosovë, sipas kërkesës së Grupit Parlamentar të Lidhjes Demokratike të Kosovës,
2. Shqyrtimi i raportit të performansës së ndërmarrjeve publike për vitin 2011,
3. Zgjedhja e një (1) anëtari të Këshillit të Komisionit të Pavarur për Media.

1. Debat parlamentar për gjendjen ekonomike në Kosovë, sipas kërkesës së Grupit Parlamentar të Lidhjes Demokratike të Kosovës

Kryetari i njoftoi deputetët se Grupi Parlamentar i Lidhjes Demokratike të Kosovës, në bazë të nenit 15.8 të Rregullores së Kuvendit, ka parashtruar kërkesë për debat parlamentar lidhur me gjendjen ekonomike në Kosovë.

Kryetari e ftoi përfaqësuesin e Grupit Parlamentar të LDK-së që, në cilësinë e propozuesit të çështjes, ta marrë fjalën.

Hykmete Bajrami, në emër të Grupit Parlamentar të LDK-së, fillimisht tha se gjendja ekonomike në Kosovë sa vjen e përkeqësohet. Të dhënat për papunësinë tregojnë se mbi 70% e të rinjve janë të papunë, ndërsa varfëria është thelluar tej mase. Shumë familje, sidomos ato që nuk kanë të punësuar, mezi i plotësojnë nevojat elementare për jetë. 5 vjet pas shpalljes së pavarësisë, institucionet e Kosovës karakterizohen me joefikasitet, korrupsion e nepotizëm.

Qeveria e Kosovës, e dhënë pas interesave ditore, politike, i ka harruar qytetarët dhe bizneset. Rritja e ngarkesës tatimore për bizneset e vogla ka bërë që një numër i madh i tyre të shkojnë në falimentim, ose të dalin në informalitet. Si rezultat, sot varfëria dhe papunësia janë më të larta se para 5 vjetëve, kur u shpall pavarësia e Kosovës dhe të gjitha të dhënat e tregojnë këtë konstatim.

Në vazhdim, ajo u fokusua në të dhëna statistikore të Qeverisë së Kosovës dhe të Fondit Monetar Ndërkombëtar, rreth rritjes reale ekonomike në vend, papunësisë, përmirësimit të ambientit të biznesit dhe të dhëna tjera gjatë periudhës kohore në pesë vjetët e fundit.

Buxheti është i paqëndrueshëm. Të hyrat ende mbledhen nga Dogana. Administrata Tatimore e Kosovës nuk ka kapacitete për t'i mbledhur tatimet në brendi të vendit. Në këtë formë ajo po i ngarkon shumë bizneset vendore. Ekonomia informale është e lartë, borxhi publik po rritet, sepse Qeveria po shet letra me vlerë për t'i financuar shpenzimet e saj operacionale.

Për më tepër, investimet publike janë strategjikisht të gabuara. Shumica e investimeve publike po bëhen pa analizë paraprake për normën e kthimit apo përfitimit publik dhe privat nga këto investime. Investimet në autostradë nuk po japin asnjë efekt për ekonominë vendore për shkak të përjashtimit të firmave vendore nga ky projekt dhe efektet zero në zvogëlimin e kostove të transportit të bizneseve.

Kontrata për autostradën Morinë-Merdar asnjëherë nuk u bë transparente, as për deputetët, e as për qytetarët. Ndërrohet traseja e autostradës në kundërshtim me projektin e aprovuar. Kostoja është shumë e lartë, 10 milionë euro për një kilometër katror.

Lidhja Demokratike e Kosovës konsideron se edhe politika tatimore është e gabuar. Qeveria po i ngarkon me shumë taksa qytetarët me të ardhura të ulëta dhe mesatare dhe bizneset e vogla, ndërkohë që po i liron nga taksat qytetarët me të ardhura të larta dhe korporatat e mëdha. Kjo Qeveri e ka trefishuar normën e tatimit në pronë, e ka rritur tatimin mbi vlerën e shtuar nga 15 në 16% dhe e ka rritur 80% ngarkesën për bizneset e vogla, nga 5 deri 9%.

Distribucioni dhe Furnizimi me Energji shitet me çmim qesharak prej 26,3 milionë euro. Në rrjetin e Distribucionit vetëm në 5 vjetët e fundit janë investuar 55 milionë euro.

Procesi i privatizimit të 75% të aksioneve të Postë-Telekomit të Kosovës është stërzgatur, është përsëritur disa herë në mungesë të investimit të firmave relevante.

Kryeministri i Kosovës, Hashim Thaçi, tha se ky debat do ta ndihmojë edhe Qeverinë, por edhe opozitën në qartësimin e pozicioneve që Qeveria të punojë edhe më tepër dhe opozita në të njëjtën kohë të jetë edhe më e qartë. Që në fillim dua të theksoj se si udhëheqës i Qeverisë së Republikës së Kosovës, gjatë kësaj periudhe 5-vjeçare, për aq sa jam përkushtuar për

realizimin e prioriteteve strategjike në rrafshin politik për Republikën e Kosovës, jam përkushtuar edhe për realizimin e orientimeve strategjike në rrafshin ekonomik.

Gjatë këtyre 5 vjetëve, ekonomia e Kosovës ka shënuar rritje mesatare ekonomike prej rreth 5%. Kjo mesatare e rritjes reale ekonomike është gati dy herë më e lartë se mesatarja e rritjes reale ekonomike në 5 vjetët para shpalljes së pavarësisë. Ky fakt tregon se politikat ekonomike kanë qenë të suksesshme në shënimin e progresit ekonomik dhe në ruajtjen e qëndrueshmërisë ekonomike gjatë kësaj periudhe krize në ekonominë globale.

Gjithashtu, të ardhurat për kokë banori kanë shënuar rritje të vazhdueshme gjatë kësaj periudhe. Gjatë kësaj periudhe 5-vjeçare kemi arritur që nëpërmjet këtyre politikave adekuatë ekonomike të krijojmë kushte për rritjen e të ardhurave për kokë banori për dy herë më shpejt se gjatë 5 vjetëve para shpalljes së pavarësisë. Pra, gjatë kësaj periudhe ato janë rritur mbi 70%, derisa kjo rritje gjatë 5 vjetëve para shpalljes së pavarësisë ka qenë vetëm rreth 40%.

Duke u bazuar në filozofinë e rritjes dhe zhvillimit të qëndrueshëm ekonomik dhe të përcjellë me stabilitet makrofiskal, menjëherë pas shpalljes së pavarësisë e kemi dizajnuar platformën reformatore ekonomike të Republikës së Kosovës.

Në vitin 2009 e kemi përgjysmuar normën e tatimit në fitim dhe e kemi përgjysmuar secilën prej normave marginale në të ardhurat personale. Nga ky lehtësim fiskal kanë përfituar të gjithë qytetarët dhe të gjitha bizneset.

Po ashtu, qëllimi i këtij lehtësimi fiskal ka qenë që nëpërmjet ngarkesës më të vogël tatimore të stimulohet zgjerimi dhe fuqizimi i sektorit privat dhe kështu të përshpejtohet rritja dhe zhvillimi ekonomik në vend. Të dyja këto qëllime janë realizuar.

Zgjerimi i aktivitetit ekonomik është reflektuar direkt në rritje ekonomike më të madhe gjatë viteve në vazhdim. Sërish me qëllim të krijimit për përshpejtimin e rritjes dhe zhvillimit ekonomik, ne e kemi dizajnuar pakon e re fiskale. Në kuadër të kësaj, janë ofruar lirimet doganore për mallrat që shfrytëzohen si lëndë e parë, gjysmëprodukte, ambalazh dhe makineri, të cilat shërbejnë për prodhim, duke përfshirë këtu edhe linjat e prodhimit.

Kosova do të fillojë ndërtimin e Termocentralit Kosova e Re dhe të investojë në ndërtimin dhe përmirësimin e sistemit të ngrohjes.

Infrastruktura e telekomunikimit - Edhe në këtë fushë, sikur në fushat tjera, janë realizuar projekte me qëllim të përmirësimit të standardit jetësor dhe gjithë qytetarëve. Për herë të parë në Republikën e Kosovës është mundur konkurrenca në sektorin e telekomunikimit nëpërmjet dhënies së licencës së operatorit të dytë.

Në arsim kemi bërë investime të jashtëzakonshme, përfshirë këtu investimet në infrastrukturë dhe në përmirësimin e cilësisë së arsimit.

Gjatë kësaj periudhe kemi ndërtuar rreth 100 objekte shkollore të reja anekënd Kosovës dhe shumë të tjera i kemi rinovuar. Po ashtu, kemi ndërtuar edhe objekte të fakulteteve të ndryshme, por edhe instituteve të ndryshme këtu në Prishtinë. Kemi ndërtuar edhe dy konvikte të reja për t'ua lehtësuar studentëve jetën e re.

Tani Universiteti Publik i Prizrenit veç ka filluar të konsolidohet, e ka filluar punën edhe Universiteti Publik tjetër në Pejë, ka filluar ndërtimi i objektit të Universitetit Publik në qytetin

e Mitrovicës, ndërsa Universiteti Publik në Gjilan do ta fillojë punën më 1 tetor të këtij viti. Jemi në fazën e përgatitjeve intensive për Universitetin Publik në Gjakovë dhe do të punojmë maksimalisht për krijimin e kushteve dhe rrethanave të përshtatshme edhe në Ferizaj.

Zenun Pajaziti, në emër të Grupit Parlamentar të PDK-së, tha se këto vite rritja ekonomike në Kosovë ka vazhduar me një progres, me gjithë faktin që pothuajse të gjitha shtetet evropiane kanë ngelur ose kanë pasur trendë negativë që nga viti 2010. Kosova ka shënuar rritje konstante prej më shumë se 3%, ndërsa në vitin 2011 është shënuar rritja më e madhe ekonomike prej 5%. Në vitin e kaluar bruto produkti vendor ishte 3,9%, ndërsa në këtë vit po ashtu parashikohet një rritje më e madhe se 3% dhe kjo është inkurajuese, jo ndoshta shumë e pritshme përkundër nevojave që i kemi ne, por është inkurajuese për shkak të trendëve të përgjithshëm që janë rreth nesh.

Me gjithë sfidat e shumta nëpër të cilat ka kaluar Kosova, në vitet e fundit kemi arritur të bëhemi anëtar i institucioneve financiare ndërkombëtare, siç janë Banka Botërore, Fondi Monetar Ndërkombëtar, Banka Evropiane për Rindërtim dhe Zhvillim, të cilat nëpërmjet kredive të buta, do të vazhdojnë ta ndihmojnë zhvillimin ekonomik të vendit.

Në kuadër të këtyre politikave, Qeveria ka arritur ta ruajë borxhin publik të ulët, po ashtu nëpërmjet politikave monetare e fiskale Kosova ka arritur t'i rrisë të ardhurat doganore nëpërmjet rritjes së akcizës.

Grupi Parlamentar i Partisë Demokratike e inkurajon Qeverinë në përmbushjen e kriterëve ose sfidave në Raportin e Progresit. Ne do ta luajmë rolin tonë po ashtu në pjesën që na takon sa i përket legjislacionit dhe po ashtu njëkohësisht i ftojmë edhe deputetët, forcat politike dhe të gjithë ta luajnë rolin e tyre në bazë të përgjegjësisë që kanë, në mbështetjen e politikave që e çojnë vendin tonë kah rritja ekonomike dhe përmirësimi i jetës së qytetarëve në vend.

Ismet Beqiri, në emër të Grupit Parlamentar të LDK-së, e kritikoi qëndrimin e Qeverisë për mosmiratimin e Ligjit për Prishtinën, si dhe, siç tha ai, politikat diskriminuese të Qeverisë ndaj komunave që nuk i udhëheq PDK-ja.

Duke mos e anashkaluar rëndësinë e investimeve kapitale në infrastrukturë, megjithatë rreth 60% e këtyre investimeve shkojnë për infrastrukturë dhe vetëm 4,6 e këtyre investimeve shkojnë në arsim. Vetëm 2,7% e investimeve janë të lidhura direkt me projekte që promovojnë zhvillim ekonomik. Në tre vjetët e kaluara, në komunat që udhëhiqen nga PDK-ja është investuar mesatarisht 2 herë më shumë për kokë banori se në komunat që udhëheqin partitë tjera, në këtë rast LDK-ja, por sigurisht edhe AAK-ja.

Në fund, ai foli për depolitizimin e institucioneve, çështje kjo e cila ndikon edhe në zhvillimin ekonomik, sepse në momentin që politizohen institucionet aty ka mundësi edhe të mos e kryejnë atë funksion për të cilin edhe janë të formuara.

Visar Ymeri, në emër të Grupit Parlamentar të Lëvizjes “Vetëvendosje”, tha se kur diskutojmë për ekonominë, duhet ta kemi parasysh një gjë, së pari duhet ta diskutojmë modelin. Pra, është lajthitje që të mendohet se ekziston vetëm një model ekonomie, sepse pastaj në këtë model ekonomie diskutimi domosdoshmërisht do të jetë një lloj gare, në mes të asaj se kush do të jetë më i mirë përbrenda një modeli të caktuar dhe kornizave të caktuara ekonomike, që nënkupton kush është menaxher më i mirë i aspekteve të caktuara të atij modeli.

Kur ta kuptojmë që ekzistojnë më shumë modele ekonomike, atëherë do ta kuptojmë se cili prej atyre modeleve ekonomike, bazuar në parime kryesore politike dhe në rrethanat e një vendi të caktuar, mund të jetë më i suksesshëm për vendin.

Pra, i vetmi synim kur flasim për modelin ekonomik duhet të jetë zhvillimi ekonomik, për shkak se zhvillimi ekonomik është e vetmja gjë pa alternativë, ndërkohë që këtu edhe te Qeveria e Kosovës e vetmja gjë pa alternativë është ekonomia e tregut të lirë.

Në fund, ai foli për projektin e Qeverisë për rritje ekonomike, që bazohet në investime të huaja direkte, shumica e të cilave po shkojnë në ndërtim dhe në patundshmëri. Atëherë faktikisht ne nuk do të kemi rritje ekonomike fare, e cila do të përkthehet pastaj në rritje të mirëqenies së qytetarëve.

Është e rëndësishme që ta kemi një model tjetër të zhvillimit dhe ky model tjetër i zhvillimit është ai që quhet shteti zhvillimor, i cili i merr masat dhe është aktor në skenën ekonomike, për ta mundësuar rritjen e prodhimit, rritjen e sektorit privat, mbrojtjen e tregut, qasjen në financa dhe zvogëlimin e papunësisë, tha ai.

Ardian Gjini, në emër të Grupit Parlamentar të AAK-së, fillimisht replikoi me fjalën e kryeministrit rreth rritjes së buxhetit, rritjes së të hyrave dhe rritjes së GDP-së në Kosovë.

Ai tha se në vazhdim do t'i paraqesë disa të dhëna statistikore, të cilat janë marrë nga Raporti për Kosovën në portalin ec.europa.eu.int:

- të hyrat vetjake buxhetore në vitin 2007 janë votuar, domethënë në vitin 2007 për vitin 2008, s'kanë qenë këta në Qeveri, kanë qenë 943 milionë euro.
- Në vitin 2012 të hyrat vetjake të Qeverisë së Kosovës kanë qenë 1 miliard e 128 milionë euro, që bëjnë diku pak më pak se 200 milionë euro në total për 5 vjet.

Për rritjen e GDP-së, sipas referencës së lartpërmendur, theksoi se është:

- më 2007 - 6,3%
- më 2008 - 6,9%,
- më 2009 - 2,9%,
- më 2010 - 3,9%,
- më 2011 - 5%, dhe
- më 2012 - 3,8%,

Ndërsa për kokë banori është:

- më 2008 - 5,6%,
- më 2009 - 1,4%,
- më 2010 - 2,5%,
- më 2011 - 3,4%, dhe
- më 2012 - 2,2%.

Më pas, deputeti Gjini foli edhe për disa aspekte tjera që lidhen me rritjen ekonomike, vlerën e parasë së investuar, arkat fiskale dhe distribucionin në KEK.

Myzejene Selmani, në emër të Grupit Parlamentar të Koalicionit Kosova e Re, tha se e përkrah debatin e iniciuar nga Lidhja Demokratike e Kosovës për zhvillimin ekonomik në

vend, duke marrë parasysh se zhvillimi i qëndrueshëm është sfidë e madhe për Qeverinë e Kosovës.

Nëse e shohim gjendjen ekonomike të qytetarëve të Kosovës, mund të themi se edhe ne si subjekt politik nuk mund të jemi shumë të kënaqur, ka përparime, mirëpo jo në atë masë çfarë u takon qytetarëve të vendit.

Kosova në Kushtetutë definohet si shtet me ekonomi të lirë të tregut dhe konkurrencë të lirë dhe rritja ekonomike vjen nga investimet kapitale, të cilat rrjedhin nga buxheti i Kosovës.

Në vazhdim, ajo u fokusua në aspekte të tjera të zhvillimit ekonomik, konkurrencën e lirë të tregut dhe në investimet në ndërmarrjet e vogla dhe të mesme.

Më pas, ajo foli edhe për ndërtimin e autostradës, për të cilën tha se çështja e përfitimit nga autostrada do të jetë më e ngadalshme, për arsye se dihet mjaft mirë që investimet nuk mund të kthehen në moment, pastaj për privatizimin e Distribucionit dhe Furnizimit dhe çështjen e investimeve në Postë-Telekomin e Kosovës.

Diskutimet e deputetëve: Hykmete Bajrami, kryeministrit Hashim Thaçi, Zenun Pajaziti, Ismet Beqiri, Visar Ymeri, Ardian Gjini dhe Myzejene Selmani janë dhënë të plota në transkript.

Për këtë pikë të rendit të ditës diskutuan edhe deputetët: Berat Buzhala, Sabri Hamiti, Visar Ymeri, Salih Morina, zv/kryeministrja Mimoza Kusari Lila, Albin Kurti, Fadil Demaku, Hashim Dëshishku, Afrim Hoti, Xhevdet Neziraj, Kurtan Kajtazi, Afërdita Berisha-Shaqiri, ministri Besim Beqaj, Alma Lama, Kimete Bajraktari, Muhamet Mustafa, Safete Hadërgjonaj, Ali Sadriu, Albulena Haxhiu, Sadri Ferati, Nijazi Idrizi, Afrim Kasolli, Teuta Haxhiu, Rita Hajzeraj-Beqaj, Hydajet Hyseni, Vjollca Krasniqi, Ramiz Lladrovci, Naser Osmani, Halit Krasniqi, Vjosa Osmani, zv/kryeministri Hajredin Kuçi, Arben Gashi, Sala Berisha-Shala, Lirije Kajtazi, Ganimete Musliu dhe Teuta Sahatqija, diskutimet e të cilëve janë dhënë të plota në transkript.

Deputeti Bekim Haxhiu diskutimin e tij e dorëzoi me shkrim.

Deputetja Hykmete Bajrami, në emër të propozuesit të çështjes, në fund të debatit e paraqiti tekstin e rekomandimeve për miratim nga Kuvendi.

Në vazhdim, kryetari konstatoi se në sallë janë të pranishëm 46 deputetë, prandaj nuk ka quorum për të proceduar me votim lidhur me këtë pikë të rendit të ditës.

2. Shqyrtimi i Raportit të performansës së ndërmarrjeve publike për vitin 2011

Deputeti Ali Sadriu, në emër të Komisionit për Mbikëqyrjen e Financave Publike, tha se si komision e kemi shqyrtuar raportin e performansës së ndërmarrjeve publike për vitin 2011 dhe kemi rekomanduar mosmiratimin në mbledhje plenare. Diskutimi i deputetit Ali Sadriu është dhënë i plotë në transkript.

Kryetari e hapi debatin për shqyrtimin e raportit të performansës së ndërmarrjeve publike për vitin 2011.

Për këtë pikë të rendit të ditës diskutuan edhe deputetët: Ramiz Lladrovci, në emër të Grupit Parlamentar të PDK-së; Ismet Beqiri, në emër të Grupit Parlamentar të LDK-së; Afrim Hoti, në

emër të Grupit Parlamentar të Lëvizjes “Vetëvendosje”; Ardian Gjini, në emër të Grupit Parlamentar të AAK-së; Myzejene Selmani, në emër të Grupit Parlamentar të Koalicionit Kosova e Re, si dhe ministri Besim Beqaj, diskutimet e të cilëve janë dhënë të plota në transkript.

Deputeti Hashim Deshishku tha se diskutimin e tij për këtë pikë të rendit të ditës do ta dorëzojë me shkrim.

Më pas, kryetari konstatoi se nuk kemi kuorum për të proceduar me votim lidhur me këtë pikë të rendit të ditës.

Kryetari konstatoi përfundimin e mbledhjes së sotme, ndërsa vazhdimi i mbledhjes plenare do të vendoset në mbledhjen e radhës së Kryesisë së Kuvendit me kryetarët e grupeve parlamentare.

Kryetari i përfundoi punimet e mbledhjes plenare në orën 19:10.

E enjte, më 4 prill 2013

Vazhdimi i mbledhjes plenare, e filluar më 29 mars 2013

Mbledhjen e kryesoi kryetari Jakup Krasniqi, ndërsa i ndihmoi nënkryetari Xhavit Haliti.

Kryetari e deklaroi të hapur vazhdimin e punimeve të mbledhjes plenare, e filluar më 29 mars 2013.

Kryetari kërkoi nga deputetët që nëpërmjet një votimi elektronik të deklarohen lidhur me praninë e tyre në sallë.

Kryetari konstatoi se nëpërmjet votimit elektronik për praninë e deputetëve, në sallë janë të pranishëm 76 deputetë.

Kryetari procedoi me pikat e mbetura të rendit të ditës, si në vijim:

- 1. Votimi i rekomandimeve të debatit parlamentar për gjendjen ekonomike në Kosovë, sipas kërkesës së Grupit Parlamentar të Lidhjes Demokratike të Kosovës*

Kryetari i njoftoi deputetët se debati për këtë pikë ka përfunduar në mbledhjen e datës 29 mars 2013, por në mungesë të kuorumit nuk është proceduar me votim.

Ai e ftoi deputeten Hykmete Bajrami që në emër të GP të LDK-së t'i paraqesë edhe një herë rekomandimet për votim.

Më pas, kryetari hodhi në votim rekomandimet e paraqitura nga deputetja Hykmete Bajrami, në emër të GP të LDK-së, lidhur me debatin për gjendjen ekonomike në Kosovë.

Rezultati i votimit ishte, si vijon:

Për ----- 38,
Kundër -----38,
Abstenime ----- 1.

Kryetari konstatoi se në bazë të nenit 51.6 të Rregullores së Kuvendit, kur kemi numër të barabartë të votave “për” dhe “kundër”, **konstatohet se propozimi nuk është miratuar.**

2. Votimi i raportit të performansës së ndërmarrjeve publike për vitin 2011

Kryetari i njoftoi deputetët se debati për këtë pikë ka përfunduar në mbledhjen e datës 29 mars 2013 , por në mungesë të kuoromit nuk është proceduar me votim.

Pastaj, kryetari e hodhi në votim miratimin e raportit të performansës së ndërmarrjeve publike për vitin 2011.

Rezultati i votimit ishte, si vijon:

Për----- 38,
Kundër----- 35,
Abstenime----- 7.

Kryetari konstatoi se Kuvendi, me shumicë votash, e miratoi raportin e performansës së ndërmarrjeve publike për vitin 2011.

3. Zgjedhja e një (1) anëtari të Këshillit të Komisionit të Pavarur për Media

Kryetari i informoi deputetët se Komisioni ad hoc për përzgjedhjen e një anëtari të Këshillit të Komisionit të Pavarur për Media i ka shqyrtuar nominimet e kandidatëve për anëtar të Komisionit të Pavarur për Media dhe Kuvendit i ka paraqitur rekomandimin për miratim.

Arsyetimin e raportit me rekomandime në emër të Komisionit ad hoc për përzgjedhjen e anëtarëve të Këshillit të Komisionit të Pavarur për Media e paraqiti deputetja Xhevahire Izmaku.

Më tej, kryetari sqaroi se për zbatimin e procedurës së votimit të fshehtë kërkohet krijimi i një komisioni votues nga përbërja e deputetëve, me mbështetje të zyrtarëve të Administratës, dhe i ftoi përfaqësuesit e grupeve parlamentare që të propozojnë nga një anëtarë për Komisionin votues.

Grupet parlamentare i propozuan këta anëtarë:

1. G/P PDK - Idriz Vehapi,
2. G/P LDK - Salih Morina,
3. G/P Vetëvendosje - Albana Gashi,
4. G/P AAK - Teuta Haxhiu,
5. G/P Koalicioni Kosova e Re - Suzana Novobërdaliu,
6. G/P SLS - Mursel Haljilji,
7. G/P “6+” - Albert Kinolli.

Kuvendi e miratoi emërimin e anëtarëve në Komisionin votues.

Në vazhdim, deputetët u ftuan një nga një për të votuar.

Pas numërimit të fletëvotimeve, në emër të Komisionit votues, raportin e paraqiti Idriz Vehapi.

Ai konstatoi se në votim morën pjesë 93 deputetë, ndërsa të pavlefshme janë 17 fletëvotime.

Rezultati i votimit është si në vijim:

Për një (1) anëtar të Këshillit të Komisionit të Pavarur për Media, Lumturije Blakaj ka fituar 39 vota, ndërsa Driton Qeriqi ka fituar 37 vota.

Idriz Vehapi tha se në bazë të rezultateve të votimit, në pajtim me nenin 11 të Ligjit nr. 04/L-44, për Komisionin e Pavarur për Media dhe të nenit 51 të Rregullores së Kuvendit, asnjëri nga kandidatët nuk zgjidhet anëtar i Këshillit të Komisionit të Pavarur për Media.

Kryesuesi konstatoi se Kuvendi mori këtë:

VENDIM

1. Asnjëri nga kandidatët e propozuar: Lumturije Blakaj dhe Driton Qeriqi, nuk zgjidhet anëtar i Këshillit të Komisionit të Pavarur për Media.
2. Komisioni i Pavarur për Media duhet të nxjerrë shpallje publike për zgjedhjen e një (1) anëtari nga radhët e komunitetit shumicë shqiptar, në pajtim me nenin 11.2 të Ligjit për KPM.
3. Vendimi hyn në fuqi ditën e miratimit.

Kryetari i konstatoi të mbyllura punimet e mbledhjes së sotme në orën 11:50 minuta.

Kryetari i Kuvendit

Jakup KRASNIQI

Procesverbalin e hartoi:

Drejtorja për Çështje Plenare dhe Procedurale